

JAORGANK 17 - 2023

# de Vulewapper

OETGAVE VAN SJTADSVASTELAOVESVERENIGING D'N UUL REMUNJ



## Jimi I Van Rey

JEUGPRINS D'N UUL 2023

## Leef Vuelkes en Vulinnekes en alle anger kienjer oet Remunj.

Geer hób 'm in eur henj! De boemvólle Uulewapper 2023! Veer hóbbe weer oos bès gedaon óm de sjoonste artiekeley veur uch te verzamele. Waat dach geer bievuebeeld van de veurbereijing van de Uulejónges, 't nejklupe van de gardes en 'n interview mit de Sjeng Kraft Kompenei.

Mer neet allein det. De nuje maedjes van de Kienjer- en Jeuggarde sjtaon te trappele óm zich veur te sjtèlle én D'n Uul haet d'r ein nuuj kermisbie. Nuujsjerig nao waat die doon? Laes den mer ins heel rap wiejer.

Oeteraard sjoete veer aaf mit 't döbbelinterview tösse de twee Sjtdsprinse van D'n Uul.

**Heel vööl laes- en  
vastelaovesplezeer.  
De riddaksie Uulewapper**

*P.S. Bie inkele sjtökskes zólt geer ouch QR-codes zeen sjtaon. Es geer die code mit 'ne QR-scanner op de smartphone scant, kint geer online nog meer bekieke en beloestere euver det óngerwerp.*

## Sjnapsnazebal

**Höbs dich zin in sjpelkes en vette meziek? Kóm dan bieje ós aan en same make veer d'r twee sjoon middage van. Ouch de Sjtdsprins en Sjtdsjeugprins zólle mit häör gardes bieje ós aankómme.**

Wanneer : Zóndaag 19 & Maondaag 20 fibberwarie  
Wo : 't Witte Kirkske (veursjtad)  
Wielaat : 16:00 toet 20:00  
Doelgroep : 0 t/m 12  
Antree : Graties en veur nieks!

**!** Veer zeuke dringend helpers vanaaf 11 jaor mer ouch elders die wille óngersjeune. Same zorge veer veur de Vastelaovesmeziek, bedinke veer sjpelkes en regele veer artieste. Eder hendje is hel neudig. Want dit moog toch neet verlaore gaon!? Aanmelje kin vieje secretaris@dn-uul.nl.

**TOET  
DAN!**



Es geer noe eder jaor de prachtige Uulewapper en Zjwetskammezaol mit ouch de Uulepin van 't jaormotto van det jaor op de deurmat wilt, maak uch pappa's en mamma's dan gans gek om uch lid van D'n Uul te make en kom ouch bie os Uulefemielle. Veur € 22,- per jaor zeen volwassene lid of veur € 11,- per jaor bösse jeuglid van D'n Uul. Dan profiteert geer geliek van alle veurdeile van ein Uule-lidmaotsjap.

# LimBo

## Winnaar Remunjse Vastelaovesjlayer Kómpetisie 2022-2023



*"Ich veul mich vereerd óm dit jaor de winnaar te zeen van de Remunjse Vastelaovesjlayer Kómpetisie en ich zal Remunj zeer zeker gaon verwinne met de vastelaovend."*

Det zeen de wäörd van LimBo, de arties dae dit jaor mit zien leedje 'Kóm noe nao veure' de nuje sjlayer gewónne haet. Leer uch de teks oet de kop en zing de ganse vastelaovend mit mit LimBo!!

### LimBo - Kom noe nao veure

Veer mótte danse, mótte sjpringe  
Om ós zelf werm te haje  
Want ouch mit döbbel glaas  
Is de enerzjie neet te betale  
Dus zeuk ich 'ne leve  
Die mich enerzjie kin gaeve  
Det mit mich löp alle daag  
Veurop in de polonais  
Ze kinne van ós drinke  
Ze kinne van ós aete  
Maar ein dink moge ze neet vergaete  
Vastelaovend is oos laeve

#### Refrein

Kóm noe nao veure  
Drej mer in 't rónj  
Maak dich lekker werm  
En sjpring van de gróndj  
Kóm noe nao veure  
Drej mer in 't rónj  
Mit dien henj oppe knieje  
Drej mer mit dien kóntj

Al sjteit de waereld in vuur en vlam  
Krieg noe mer de rambam  
't Is noe vastelaovend hie  
Dus zit alle zörg mer opzie  
Ich dans de soca de latino  
Mer mit sjlayer hób ich sjans  
Dus zeuk ich ein dansmarieke  
Det duit de kozakken dans  
Kins doe mich verwerme  
Mit dien gedans en dien gesjans  
Al höbs se döbbel glaas van Koolen  
Maak se hie geine kans  
Dus bel mich neet veur glaas  
En bel mich neet veur beer  
Mer bel mich veur de wermte  
Mien vastelaovesdeer



# Alles paletti? Confetti!

**Jimi, gebaore op 26 oktober 2011, sjtraolt, es hae ziene liefsjpreuk oetsjpruk.**

Gebaore in 't zekehoes in Remunj en de eerste laevesjaore doorgebracht in Azerao in 't Nachtegaleriek, greijt Jimi veural 'boete' op. In 2015-2016 geit moder Danny, zelf opgegheurd in 't Donderbölriek, vlak bie de ECI, en vader Jos, zelf opgegheurd in 't Katerriek in Neel en Aad Ajudant van Prins Marc II (2019), in 't Hammerveld wone en waert Jimi 'ne echte sjtadsjong. Ongertösse woont Danny mit häöre vrundj Niek en zien kienjer Lucas en Louis in Vlörp en woont Jos same mit Charlotte in 't Hammerveld. 'ne Gezellige boel!

Pap en mam wirke in de sjtad. Danny haet 'n damesmodezaak in de Neersjtraot, Jos wirk in 't vasgoed. De Sjteine Brök waert Jimi's basissjool en Azerao blief in zien hert wo Jimi inkele daag door de waek bie kienjerdaagverblijf 'de Beestenboel' waert óngergebracht, net wie zien zósterke Valerie. Jimi is de grote broor van zósterke Valerie (9 jaor). Jimi zit in groep 8, Valerie in groep 6 van De Sjteine Brök en 't dans bie de Kienjergarde. Broor en zós zeen good aan ein gewaag en viere vanaaf jónge laeftied al gaer Vastelaovend!

**Jimi** is veural gek op voetbal en mit vrundjes aafspraake en drop oettrèkke of eigelik 'sjoje', en dan netuurlik 't leefs mit zien adjudante Tijn en Sam, ouch groep 8-gangers van De Sjteine Brök. Jimi is ouch aanveurder van de JO12-3 van SHH wovan vader Jos ouch trainer is.

**Tijn**, 'ne 'Uulejóng' en zelf 'n verdedigend talent bij SHH JO12-1, is de zoon van Frits en Kim Criens-Allers, gein ónbekinde binne D'n Uul. Frits sjrief ónger angere veur de Uulewapper. De tweelingzós van Tijn, Tirza, dans ouch net wie Valerie bie de Kienjergarde.

**Sam**, zelf 'ne gedreve handjballer en skiejer, is de zoon van de horecaóngemaemers Michel en Ankie Schlicher-Janssens en kleinzoon van Aad Prins Thei IV (1998).

't Trio is altied in veur 'n feesje en is blie det ze de Vastelaovend op 'n normale meneer kinne viere. Ze kieke d'r nao oet. Veur jónk en aad, haaj dien handj op dien glaas, de kónfettie boys gaeve gaas!



skan mich

# PROKLEMASIE



## Sjtaadsjeugprins van Remunj

Bie de grasie van Sjtaadsvaste laovesvereniging 'n Uul  
in 't jaor 2023.

Gebaore in 't Nachtegaleriek in Azerao mer es echste Remunjse jóng opgegrouj  
aan de randj van de sjtaad. Sjpieler bie SHH 10-12 en leerling van de Sjeine Brök. Zoon van  
Aad adjudant Jos en moder Danny, grote broor van Gardemaedje Valerie. Kleinzoen van Jos sr.  
Aad-violist bie de Prinselikke Stadsjarde 'Faubourg St. Jacques Remunj, Corry en Leo,  
Marianne en Ed.

Dit jaor ongersjteund door gooj vrunj en adjudante Tijl en Sam.

### Gaeve uch te kinne

- 1 det veer same heel get kónfettie
  - 2 det veer de meziek van Vaste laovend
  - 3 det veer de kónnende tied op maon.
  - 4 det veer gaer door de sjtaad sjoje
  - 5 det Sam dit jaor geine sjneej in
  - 6 det veer os weer ech vrie veule om
  - 7 det veer same mit alle kienjer van
  - 8 det veer os gaer
  - 9 det veer Tijl van de Uulejónges
  - 10 det veer dit jaor meer op de buisje sjtaon es op de graasmat.
  - 11 det veer vrunj blieve veur 't laeve..
- kenonne aaf gaon sjete..  
dit jaor allein mer hël wille heure..  
daagmorge onger de kónfettie versjiene  
Sjeine Brök..  
om get te sjlökke of te sjnekke..  
de haor haet mer kónfettie..  
richtig gaas te gaeve..  
Remunj gaon feeste wie de beeste..  
prinselik laote verzorge..  
geleend hóbbe veur tonne kónfettie..  
geleend hóbbe veur tonne kónfettie..  
geleend hóbbe veur tonne kónfettie..



opgeteikend en besjpraoke in Remunj onger  
os en onger oze liefsjpreuk:

# ALLES PALETTI? CONFETTI!

## Galerie van (aap) Sjtaadsjeugprinsse mit häör adjudante



2019  
Daniek I mit adjudante  
Job, Vinn en Bibi



2022  
Joep III mit adjudante Arthur en Celeste



2020  
Cas I mit adjudante Tijs en Keane



Kiek veur de foto's van de  
aap Sjtaadsjeugprinsse en häör  
adjudante en oucht veur de  
interviews op [www.dn-uul.nl](http://www.dn-uul.nl)

# Leef Uulekienjer, Uulejeug en alle angere doezjende jeugdige laezers,

Veer kinne ós vrie veule! Nao vraemde jaore bars dit jaor de Vastelaovend gelökkig weer gans los! 't Is sjoon det D'n Uul 'n jaormotto haet waat hie bie pas, 'Veul dich vrie!'. De link mit de jeugdige Vastelaovesvierders is d'r ouch want dit motto is bedach door (de qua laeftied relatief jeugdige) Luuk Hendriks. Marjo Peeters maakde de jaormedalie! Dieke merci nao alle mitwirkers aan deze sjiëke 17e Uulewapper. Bie '11.111' jeugdige op de deurmat óm de Vastelaovend te bringe. Dank aan 'de hendjes' van scouting St. Hubertus. Nog eine keer kieke veer trök nao 2022. Greuts ging Joep III Opheij mit adjudante Celeste en Arthur de vereniging veur. Zónger 'kelega' had Joep III de zjwaore taak óm in Remunj en bienao gans Limburg de Vastelaovend te bringe. Gank d'r mer aan sjtaon, dao naeme veer nog eine keer sjpraekwaardelik de möts veur aaf

Gelökkig höbbe veer weer 'ne Vastelaovend mit alles drop en draan, veur uch es kienjer en jeugdige super sjiëk! Nao lang wachte is d'r weer 'ne Sjtadsprins. Op 7 jannewarie is **Spencer I Hinzen** toet Sjtadsprins van Remunj en Prins van D'n Uul geinsjtalleerd. Mit zien **adjudante Emiel Kamzol, Marnix Adams en Frank Wolfkamp** sjting Ziene Dórslöstige Hoogheid sjtraolend op de bühne. Spencer I geit ós veur ónger ziene liefsjpreuk '**Vergaet neet te laeve!**'

Mer veur de kienjer en jeugdige gebeurde 't allerbelangriekste op zónondag 15 jannewarie, 'ne chapeau veur de nuuj kemissie die de ivvenemente veur de Sjtadsjeugprins organiseert. Hae kwaam mit 'n sjpektakulaire en sjiëke act same mit zien gezelsjap es echte 'Masked Singers' nao veure. Daonao ging die vermómning aaf, **Jimi I van Rey** is oetgerope en toet 56e Sjtadsjeugprins van Remunj en Jeugprins van D'n Uul geinsjtalleerd. Mit zien vrunj **Tijl Criens en Sam Schlicher es adjudante**, geit Ziene Dórslöstige Hoogheid Jimi I ós veur ónger ziene liefsjpreuk **Alles paletti, Confetti!**. Zo is d'r veur 't eers sins 2020 weer 'n gans kóplete Uulefemielie. Dao höbbe veer nao oetgekeke en zeen veer greuts op, veer kinne ós weer vrie veule!

Mit 'n sjitterend Jeugprinselik Gezelsjap, kieke veer oet nao alle aktievieteite die D'n Uul veur de jeug en kienjer organiseert. Same mit de Kienjergarde, Jeuggarde en Uulejónges waere vööl feesjes geboewd. En waat te dinke van De Kienjermusical. Vanwaege de Oranjerie-verbewing waert dit jaor in 't Aaj Royal Theater 'n krejatieve filmproduksie door en veur kienjer opgeveurd. Vergaet ouch oos Oettrékkend Gezelsjap neet, die weer 'ne Vastelaovend mit gans kóplete Uulefemielie kinne viere. Mit oos Hooghede Jimi I, Spencer I en häör adjudante es middelpuntj zólle de Damesgarde, Prinsekepel en Raod van XI zeker perzent zeen. De wieze Senaat zólle ouch döks d'r bie zeen óm feesjes mit de kienjer en jeug te viere. Laot uch es Uulekienjer in eder geval euveral heure en zeen óm gans oet de bol te gaon en duchtig te feestee! Nog belangrieker; doot det neet allein mer naem ouch vrundjes en/of vrundinnes mit, want wie meer kienjer, wie baeter en groter 't feesje!

Same mit de Prinselike Gezelsjappe en 't ganse Oettrékkend Gezelsjap gaon veer ederein 'ne sjone Vastelaovend sjinke. Aan alle kemissies en helwirkende Uule die alle aktievieteite en ivvenemente veur de kienjer en jeug meugelik make 'ne hele dieke merci. Zónger uch zólle de kienjer en jeugdige neet kinne feestee, chapeau!

Vööl Vastelaovesplezeer gewins en **Veul dich vrie!** Aevel, vergaet neet; Vastelaovend viert ederein op zien eige wies... mer waal SAME!

*Vörs-veurzitter*  
*Dirk I Franssen*

PS: Es geer eder jaor 'ne perseunlike Uulewapper en Zjwetskammezaol mit de Uule-jaormottopin op de deurmat wilt, maak uch dan veur € 11,- (<18) of € 22,- (>18) per jaor lid van D'n Uul. Dan próffeteert geer van alle veurdeile van 'n Uule-lidmaotsjap.



# TRÖKBEIK JOEP III

Op 6 fibberwari 2022 woor 't eindelijk zo wied. In de bios höbbe veer ederein laote weite det veer neet allein de Remunjse jeug mer alle Remunjse vastelaovesvierders veur móchte gaon. Veur de video van oze karpool karaoke mit DJ Admin höbbe veer eine ganse middaag same mit oze grote held fees moge make. Naodet de video verteund waas, sjprónge veer door 't dook. Waat waas det gaaf!

## Daonao kwome d'r eielik allein mer hoogtepuntje:

Veer ginge op Uulejach door de binnesjtaed en daonao mit Uulejeug oet aete en feeste. Veer zeen geïnterviewd door de gezet en maakde opnames veur 't Zjwetskammezaol, TV Ellef en TV Remunj. Veer versierde ein ganse sjtraot in vastelaoveskleure en de Veursjtaed waerde veur ós versierd. Ouch 't bezoek aan de Aad Prinse op Kesjteelke Hattem woor super gaaf.

Vastelaovesvriedaag móchte veer de ganse daag op de "Vastelaovend wo bus-se" bös. Same mit DJ Admin höbbe veer de sjole van Remunj bezóch. Op eder sjool kwoom 'ne angere arties optraeje. 's Aoves mit Vórs Dirk nao 't grote TV Ellef sjpektakel en daonao mit Beppie Kraft nao de Ruiver. 't Woor sjoon maar waat ware veer meug nao zo 'ne lange daag.

Vastelaoveszaoterdag zeen veer mit de bös door Groot Remunj getrókke en brachte veer euveral de vastelaovend. Resepsie op zónaag in ein sjtampvol Witte Kirkske. Op maondaag Kuukskesmaondaag en daonao lepe veer oze eige optóch. Bacchusdrievie op dinsdaag en 't AAS toes in de keuke op bezoek. Naeve dit tjokvolle pergram ginge veer 's aoves lekker sjoje; verkleid en mit sjmienk op 't gezich.

't Woor waanzinnig sjiek!

Aad Sjtdsjeugprins Joep III, aad adjudant Arthur en aad adjudant Celeste.

# JOEPIIE, 'T WÓOR WÉER VASTELAOVEND!!



## DE UULEJÓNGES sjtónge op 10 september veur häör grótste oetdaging toet noe toe... de óntraofeling van 't mysterie van ein van de belangriekste zake in 't laeve van 'ne tiener: De wifi code!

### Wie is det mysterie óntsjaon?

Ter veurbereijing op 't aankómmende seizoen woor d'r 'n euvernachting geplend bie Scouting St. Hubertus Herte (bedank veur de gasvrieheid!) en woor de plenning van de Jónges óm online alvas zo vööl meugelik inspirasie op te doon veur 't nuuj seizoen: leedjes, TikTok-denskes, Fortnite-denskes en nog vööl meer....

Helaas ging ein en anger neet wie geplend: de wifi woor namelijk beveilig mit 'n code en dees code kós allein verdeend waere door opdracht oet te veure.

De Jónges gaon 'n gooj oetdaging noijt oet de waeg en sjtórte zie zich vol euvergaaf op de bepreuvinge die zie taege kwome.

Twee groepe, De Teenagels en Sjmeksipeksi, mósdie ein avontuurlik paad van zeve sjtappe euverwinne. De baer De Uul woor los!



1. **'n Ei heurt d'r bie** (in 't Remunjs reimp det helaas neet). Edere groep kreeg 'n ei en waerde losgelaote in de nieksvermoedende buurt. Vervolgens kregen zie 'n oer de tied óm zo waerdevol meugelik te rule. En de buit woor neet misselik: doze Merci, wasverzaachter, beer(!), 'ne aaftandse verroller, pokercards, en zo wiejer. De hanjelseis is zeker aanwezig bie oos Jónges!
2. **Gans D'n Uul Bak.** Gein taarte, mer hamburgers en cheeseburgers, wie Richtige Männer! Restaurants One en Two kinne zich opmake veur de kónkerensie van Restaurant Ellef!
3. **D'n Uul Preuf.** 'ne Echte Jóng en 'ne echte Chef preuf alles, ouch geblindjook! Taege baeter weite in waerde de Daddies vertroewd en waerde de meist oetzunjerlike zake gepreuf. Aangezeen dit door kienjer gelaeze waert, zólle veer noe neet wiejer vertèlle waat d'r allemaol gegaete is.
4. **D'n Uul óntmaskert.** De herses waerde aan 't wirk gezat en kómplótte en samewirkinge waerde gesjmeed in 'n sjpannend sjpel van de Uule oet Remunj! Waem zeen de Uule en welke Katers, Muus en Kaketoos deje zich veur es Uule?
5. **D'n Uul Fik.** 't Grótste kampvuur oojt! Takke waerde gezaeg, pepier d'r bie gezóch en de vlammen waerde zo hoog opgesjtaok det de buurtbewoners zich (terech) zörg begóste te make!

6. **So D'n Uul thinks they can dance?** 't Antjwaord op dees vraag is nogal gemekkelik: 't danse mót ECH euvergelaote waere aan de Gardes. De saort van Heksedans dae de Jónges dansde óm 't vuur haer woor neet óm aan te zeen, maar waal vol passie! GAAS!
7. **D'n Uul op 'n Sjtekske.** Late night sjnekke, mer den gein bitterballe of sjwama, mer eigegemaak brood! Deig óm 'ne sjtek haer en zelf reustere in 't kampvuur toetdet 't (ein bietje) gaar woor. Det lag 'ne goje baom veur de rès van de nach!

Tössedor woor d'r nog hooggeëerd bezoek van 'n delegasie vanoet de Raod van XI om de Jónges get "euverheerlik" sjlók te bringe. Ouch dit bleek oeteindelik gein traktasie, mer 'n bepreuving! Sommige sjmake wore ..... "apaart" ..... óm 't zo mer ins te neume!

Nao al dees bepreuvinge hadde de Jónges 't mysterie eindelijk óntraofeld en kóste ze eindelijk verbinjing make mit de Wifi! Nao 'n kórte nach waerde d'r hamburgers en cheeseburgers van Mc Donald's gegaete es óntbeit, oftewaal 'n Breakfast for Champions!

**De Uulejónges zeen vaerdig veur 2023!**



# 't Mysterie van... de wifi code!

# 'ne Archivaris en 't Uulemuseum

'ne Archivaris is emes dae 'aaj sjipulle verzamelt, bewaart en ordent.  
 's Uule-archivaris en veurzitter van de kemissie Historie en Archief  
 doon icht dit om Uulegerie te verzamele en 'veur later' te beware.

In al die jaore greujde det verzamele oet toet eine grote wins: 'n 'Uulemuseum'. Klein beginne door eers 'n paar keer ittelazjes in te richte en 'n klein exposisie in 't Historiehoes. Veurig jaor kwaam 'n beving van dae wins oet!

Dit jaor weer opnuuj in 'ne winkel oppe Hamsjtraot 'n tentoonsjèlling van Uulegerie. De Aad-Prinse sjtaon dit jaor in de sjenwerpers. In de ittelaasj 'Alles' waat 'ne (Aad-)Prins neudig haet ligk klaar'. Kóm veural kieke!

## Ouch in de 'winkel' is vaol te zeen.

- 'n Unieke oetsjalling van alle hoesorde, 'n lies mit sjpreuke, teikeninge van (Aad-)Prinse en häör Prinsebeeldjes. Oetneudiginge van de Prinse veur zien resepsie en van alles waat eine Prins kedo krieg.
- Teikeninge van de 'Vastelaovend oppe Hamsjtraot' van Gerard Nizet
- Mötse van de Raod van XI wo van de aadste meer es 80 jaor aad is!!
- Aandach veur de men die oppe achtergróndj wirke en tummere, oftewaal de Technische Commissie (TC).
- Medalies, prinsekruutse, vastelaovesmeziek... Kórtóm: 'n unieke verzameling die dich vaöl kint vertèlle euver D'n Uul.

## D'r is vaol te zeen en te doon

Kóm kieke in de ittelaasj en sjtreep in 't lieske det hie ónger sjteit aan waat 'ne Prins waal of juus neet neudig haet óm Prinse van D'n Uul te kinne zeen.

## Wils se 'ne selfie?

Det geit ouch! Kóm 'ne selfie make en veul dich aeve Jeugprinse!

## Toes Uulegerie!

Wils se get meer weite euver 'Uularia', det geer bievuebeeld toes höbt ligke en det laote bekieke? Haet dien femielie nog get aads van D'n Uul en doe wèts neet waat 't is? Veer kinne dich helpe en oetligke waat en wie aad 't is.



# Hoesorde Quizzzzz

Hoesorde van Jeugprinse: 't is 'eine onger ein! De doos is gevulle en alles ligk doorein! Kins dich micht helpe en de hoesorde van de JeugPrinse weer op de juiste volgorde ligke?



In de prizentatie van D'n Uul oppe Hamsjtraot is 'n euverzich te zeen van alle hoesorde van Jeugprinse die veer in 't archief höbbe. Det archief is helaas nog neet gans kómpleet. Zit de nómmers van de hoesorde in de juiste volgorde.

--	--	--	--	--	--	--	--	--	--

 1	 2	 3	 4
 5	 6	 7	 8
 9	 10	 11	 12

# Marcel van Eeghem

Zeve vraege aan ein van de  
grote miense van de Sjeng  
Kraft Kompenei.



**Marcel van Eeghem? Sjeng Kraft Kompenei? Waem en waat zeen det noe weer? Nou, det zal ich uch 'ns oetligke. De Sjeng Kraft Kompenei zorg d'r dit jaor al 2x11 jaor veur det de 11devande11de georganiseerd waert, oorsjprónkelik in Mesjtreesch. Mer mit die tradisie waert sinds afgelopen jaor gebraoke door 't ivvenement plaats te laote vinje op oos Remunjse Sjtasieplein. Marcel van Eeghem is ein van de miense die daoveur mótte zorge.**

**Nou bèste Marcel, sjtèl uch 'ns veur in eur eige wäörd (naam, laeftied, woonplaats, hobbies)?**

Dao gaon veer dan...Miene naam is Marcel van Eeghem en ich bin 59 jaor jonk, getrouwd en woon samen mit Francis in de binnesjtad van Mestreech.

**Is de vastelaovend uch mit de paplaepel ingegaote?**

Jazeker, van kleins af aan hób ich dat virus te pakke. Ich hób dan ouch nog al de neudige sjoan herrinerungen es prins, veurzitter en president van ein vastelaovesvereniging in mien geboorteplaats Heerlen. Inmiddels is dat alweer binao 40 jaor geleeye.

**Wie zeet geer bie de Sjeng Kraft Kompenei terechtgekómme en waat is eur funksie dao?**

Miene gooië vrund Luc Overhof is een paar jaor geleeye veurzitter gewaore van de Sjeng Kraft Kompenei. Same hóbbe veer ouch gans get joare in de organisasie van 't Preuvenemint in Mestreech gezete. Toen Luc belde of ich mit wilde doon hou ich eigenlijk gein andere keus. Binnen de Sjeng Kraft Kompenei bin ich verantwoordelijk veur de PR en woordveurder. Dat doon ich euverigens ouch in mien dagelijks werk bie NATO.

**Wie zeen de maondje in aanloop nao de 11devande11de d'r oet veur uch en de Kompenei?**

Es veer oet de winterslaop komme dan beginne veer mit de èchte veurbereidinge. Veur de zomer probeere veer zo väöl meugelik zake geregeld te hóbbe – het artiesteprogram is dan wiet klaor, aafsprake mit de luuj van het leech, geluid. En natuurlijk motte veer zörrege dat er genug eate en drinke geregeld is en dat bie de gemeente, politie en brandweer alles good is aafgesjproake. Veur probeere der es vriewilligers alles aan te doan om er een sjoan feest van te make.



**Zeet geer op de daag zelf eigenlijk zenewechtig of vèlt det waal mit?**

Dat vèlt eigenlijk reuze mit...Ich organiseer al ongeveer 40 jaor feeskes dan bis ze wal get gewintj. Loat ich zo zikke het veult es ein fein sjanping, zo vaan noe kin de vastelaovend èch goan beginne. En nao aafloop houpe veer dat eederein eine prachtige daag hèt gehad en sjoan herrinerungen draan euver hèltj.

**Waat vindj geer van de "verhoezing" van de 11devande11de van Mesjtreesch nao Remunj?**

Alles is veur eederein nuuj en dat is ein èchte oetdaging, mèr veer kinne same mit vastelaovend vierend Limburg trök kieke op ein geweldige ierste editie van de 11devan11de in Remunj. De samewirking mit de gemeente Remunj en Sjtdsvastelaovesvereniging D'n Uul is geweldig good en dat veult veur os es Sjeng Kraft Kompenei dan ouch es thoeskomme. Mit doezende en doezende bezoekers oet de ganse provincie en ein lekker zunneke is het ein grandioos feest gewaore. Remunj - zo zou ze kinne zikke waor eigenlijk op de 11devande11de de hoofdsjtad van de Limburgse vastelaovend.

**Waat wilt geer de laezer(ke)s van de Uulewapper nog mitgaeve?**

Geneet veural van de vastelaovend - in de sjtad of in de eige wiek - want vastelaovend is van en veur eederein

**Nog 'n paar bonusvraege toet sjolet:**

**Waat is eur levelingsaete?**

Ich kin waal van ein vöschke geneete en mit vastelaovend moag sjpèk en ei neet ontbrèke

**Welke (vastelaoves)meziek vindj geer 't sjoonste?**

Eedere generatie hèt zien eige vastelaoves meziek en dat ving ich ein gooië ontwikkeling. Bie mich perseunlijk is en blijftj ein sjoane vastelaoves wals altied eine favoriet.

Met dank aan **oze reporter LUUK.**



# DE KIENJERGARDE 2022-2023



Foto boave van links nao rechts : Lot Puts, Liv van Dooren, Anna Wijnands, Liss Aben, Valerie van Rey, Mila Tobben, Madeleine Geenen, Saar Puts, Puk van den Brand, Sanne Vervoort, Julie Houben, Fien Tobben. Frederieke Linssen en Tirza Criens óntbraeke op dees foto.

De begeleidsters van de Kienjergarde zeen Renée Tobben en Marijn van Etten. De trainsters van de maedjes zeen Kirsten Coenen en Felicia Prestigiacomo.

18



Frederieke Linssen

Tirza Criens

## VEURSJTELLE NUUJ MAEDJES



**Sanne Vervoort**

Hoi, ich bön Sanne. Ich bön 9 jaor. Ich bön dit jaor nuuj bie de Kienjergarde en dao bön ich super greuts op! Sjimienke, verkleije, zinge, danse en 'lekker gek doon', det is Vastelaovend veur mich.

**Lot Puts**

Ik bön Lot Puts. Ich bön 6 jaor en ich kóm dit jaor bie de Kienjergarde, wó mien grote zus Saar al ein paar jaor bie zit. Aafgeloupe jaor danste ich 't denske van de Kienjergarde al mit in 't pebliek. Mien hobbies zeen zjwumme en mit dino's sipele. Wiejer knoevel ich gaer mit oos katte Manta en Baerke. Manta is zelfs al 17 jaor! Ich höb d'r dit jaor heel väöl zin in en ich haop uch flót te zeen!



19



**Liv van Dooren**

Ich bön Liv. Ich bön 7 jaor en woon in Herte. Ich doon dit jaor veur de eerste keer mit mit de Kienjergarde en de Kienjermusical. Ik bön ein ech Uulemaedje. Ich vier al mien ganse laeve Vastelaovend en ich kin hie gein genóg van kriege. Es 't aan mich ligk, vier ich 't ganse jaor door Vastelaovend!



# De Uulle Gezetz

## Bedank Raod van XI

Aan 't begin van 't seizoen waerde veer lekker getrakteerd. Veer kregene heerlike donut van de Raod van XI. Bedank Raod van XI, hae waas heerlik.

De Jeuggarde



## Verkezing kefees en restaurant

### BÈSTE FRIETTENT

- 1 McDonald's
- 2 Fritessalon Guus

### BÈSTE KEFEE VEUR DE JEUG

- 1 Braam
- 2 De King

### LEKKERSTE LOKASIE ÒM TE AETE MIT VASTELAOVEND

- 1 opStjap Bar&Bik
- 2 Grillroom Jaffa (ouch bekind es Tony)



## Ein heerlik buffetje

Op 11 september 2022 hōbbe veer same mit de Kienjergarde en de elders genaote van ein heerlik buffetje. Eine BBQ ging helaas vanwaege 't waer neet.


't Woor geweldig òm nao twee gekke jaore weer mit zien alle same te zeen in 't Witte Kirkske. Aan 't inj van 't buffetje kregede maedjes ein sjoon verrassing

van de Raod van XI. Die kwome vertèlle det ze super greuts op de maedjes wore en hadde heerlike donuts mitgebracht es toetje. Mmmmm det woor sjmulle.

Nao 't toetje en mit volle boek begōste de maedjes mit de eerste training van de gardedans veur de Sjtadsjeugprins van 2023.

Dit jaor zeen ze gesjart mit 14 maedjes, wo van de jōngste noe 6 jaor is. De trainsters Kirsten en Felicia hōbbe ein super leuk nummer oetgezōch en hie 'ne sjone dans op gemaak. Hup, die bein weer de lōch in!

Groetjes Renée en Marijn



# REMUNJS (lere) sjpraeke?!

Wilse Remunjs lere sjpraeke wie 'ne echte Uul? Eigelik is 't bès simpel, mer doe moes waal weite det 't Remunjs net get meer klanke haet dan 't gewewn Nederlands. Gelökkig zeen d'r genog vastelaovesleedjes die dich kinne helpe mit de elf belangriekste klanke oet 't Remunjs die in het Nederlands (biena) neet veurkomme. Asse dees leedjes mit kins zinge, bösse al heel wied!

## 1 De ae

Biena dezelfde klank es in dien Nike Air Force!

*Vrundj is veur aeve, kammeraad is veur 't laeve! (Big Benny)*

## 2 De ö

Zit in de mójndj get meer nao achter es de u. *Doe bös van deze squad! (want doe en ich toet laat in de aovend). (Wiesse Oetzuus)*

## 3 De ó

Deze vèlt in de mójndj (dao is d'r al) get meer nao achter es de o.

*Sjöd de jat, bóks de voes, knaup em dich, de sjabbe bloes. (Vleisboeket)*

## 4 De ò

Liek 'n bietje op de i in 't Ingelse girl of op de ou in 't Franse oeuvre.

*Ich wil de pruk weer oppe bletter, ich wil de tröt en det getetter. (Roerdassen)*

## 5. De ao

Liek op de o in 't Nederlans roze, toevallig de kleur van Wiesse oet zuus. *Maot, naef en kammeraad doe heurs noe bie ós, belaeft vastelaovend. (Dj Admin & Wiesse oetzuus)*

## 6. De è

De tóng taeye get meer taeye dien verhemelte es bie 'n geweune e. Missien kinse de klank ouch van de camping in Frankriek: asse ein 'pain' geis besjèlle. *Wètse nog die tieje, verkleijd euver de sjtraot? (Wiesse oetzuus)*

## 7. De gk

Klink wie de g in 't Ingelse 'Let's go' en/of 't Duitse 'gut'.

*En ligke nog neet op ein oor. (Naud Reyners - Laot gaon dae wage)*

## 8. De sj

Klink wie de sh van 't Ingelse 'shit'

*De sjoon, sjoon, sjoonste sjat is vastealovend viere. (Kienjermusical)*

## 9. De zj

Klink wie de j oet 't Franse 'jeu de boules'.

*Dao hadse eine diek en 'ne kleine, die jaagde iddere daag op everzjweine. (Big Benny)*

## 10. De tj

Zit ouch in de sjtraottaal wäörd 'tjappen' en 'tjappie' en 't Ingelse 'much'.

*Oet de waeg, aan de kantj. (oet 't gelieknamige leedje van Patrick Gerets)*

## 11. De Oehoe

Ok, veer beware nog get klanke veur 'ne volgende keer! De lèste is geine klank mer waal heel fein es se 'm mit kins zinge.

*En D'n Uul dae reup Oehoe, Oehoe, Oehoe!*



# Oos Nejklopke

Nao 't seizoen waere door alle gardes, de Kienjergarde, Jeuggarde en Damesgarde, de pekskes ingeleverd. Same mit de leijing van de gardes, oma's en mama's van de maedjes én twee dames van de Damesgarde höbbe veer ein aantal zóndage mit 't nejklopke in 't Witte Kirkske genejd.

Knupkes oppernuuj vasneije mit ekstra sjterk gare, nuuj ritse in de tèskes, nädjes die los wore weer vasgenejd, nuuj etikette d'r in en nuuj lintj aan de tèskes. Veer höbbe d'r veur gezorg det alles weer tiptop in orde is veur 't nuje seizoen.



# Pekskes passe

Op 8 oktober höbbe veer de pekskes gepas. En waat dink geer? Alles pas weer! De Kienjergarde haet toen same in 't Witte Kirkske ein breudje knakwórs gegaete óm daonao weer same te traine.

ouch eine keer gaon traine bie Weerstand. Det is aan de Breijewaeg wo vreuger Philips waas. Toen veer dao aankwome woor d'r echter ein klein perbleemke... Veer kóste d'r neet in, behalve Tirza. Het woor nog de paort in kinne gaon. Oeteindelik ein super lokasie óm te kinne traine!





# REMUNJSE UULEJACH 2023

## IS 'T 'N VÓSSEJACH? NAE HEUR, VEER GAON DIT JAOR OP ZEUK NAO UULE!

Op zaoterdaag 4 fibberwarie begint op 't Munsterplein de tweede edisie van de Remunjse Uulejach, ein vóssejach mit 'n vastelaovestintje! Tösse 13:30 oer en 15.30 oer zólle d'r in de binnesjtad van Remunj allerlei Uule te vinje zien en 't is aan uch óm die te gaon vinje.

Doe kins mit 'n grupke kienjer mitdoon en tösse tösse 13:30 oer en 14:30 oer ein sjtempelkaart kómme ophaole op 't Munsterplein. Det kin bie de Kiosk of boete bie Ver'koch. Daonao geis se mit dien grupke in de binnesjtad op zeuk nao de 11 Uule. Óngerwaeges is d'r van alles te belaeve en kumps se mesjiens zelf waal 'ne talentejager taege...

App dien vrunj en vrundinne en doot mit aan de tweede Uulejach. Alle kienjer zien waalgekómme! Es se sjlum bös kumps se verkleid en gesjink, want d'r zien sjoon prieze te winne. Doe kins netuurlijk ouch mitdoon mit dien klasgenote, dien sjportteam, de vastelaovesvereniging, dien scouting- of dansgroep of dien kleuternaefkes in de tweelingbuggy! Es se alle sjtempels hóbbs verzameld, hóbbe de Sjtadsjeugprins van Remunj, Jeugprins van d'n Uul Jimi I en zien adjudante Sam en Tijl mesjiens waal ein hoersorde of 'ne angere pries veur dich.



VEER HAOPE DES SE MITDUIS.  
TOET ZAOTERDAAG 4 FIBBERWARIE!

# Gaer sjtèlle veer ós aan uch veur: De kemişie Jeugprinsfeesjes!

**Ein kemişie mit veural nuje kemişieleje.  
Veer organiseren 't oetrope, de resepsie en  
't aaftraeje van de Sjtadsjeugprins.**

Veer gaeve regelmatig 'ne updeet aan de kemişie JPKBK (Jeugprinskeuze en -begeleijingskemişie) zodat veer op de heugte blieve van elkaars sjtandj van zake. Ein gooj samewirking tösse beide kemiesies en daobie hóbbe veer 't ouch nog gezellig!

Edere twee waeke vanaaf september zien veer bie-ein gekómme óm te breensjtorme. De iedeje vlogte óm de ore, noe ouch nog oetwirke! Zowie geer bie 't oetrope hób gezeen waas aafgeloup t jaor 't thema "The Masked Singer". Ein thema det leuke iedeje mit zich mit brink, waat ein talente sjtinge op det

podium en laot dao ouch nog 'ns oze Sjtadsjeugprins tösse zitte mit zien adjudante!

Ouch hadde veer ós bedach om dit jaor eine photobooth te plaatse bie 't oetrope, eine sfeermaker veur ederein. De foto's móchte mit nao hoese genoame waere es 'n herinnering aan deze sjone daag.

Hób geer ein foto gemaak van uchzelf bie 't oetrope? Gein nood es dit neet zo is, veer hóbbe 'm nog 'ns gebook, dus laot uch verrasse.

**Veer winse uch ein sjoon  
vastelaoves-sezoen,  
veer hóbbe d'r zin in!**



Ralph Bult



Mare van Heren & Isa Kievit van Haafden



Claire Lambriex



Rebin Coenen & Yvette Meijs

# DE JEUGGARDE

## 2022-2023

1 Hallou! Ich bön **ELISA PRESTIGIACOMO** en ich bön 14 jaor. Mien hobbies zeen hokkieje en danse. Ich zit op sjoel bie Yuverta Remunj. 't Leukste aan de garde vinj ich de gezelligheid mit de maedjes en 't viere van de vastelaovend. Det vinj ich altied super leuk!

2 Hallou! Ich bön **VIENNA PRESTIGIACOMO** en ich bön 14 jaor. Mien hobbies zeen voetbal en danse. Ich vinj de garde leuk want 't is 'ne leuke en gezellige groep en 't feeste is ouch altied leuk

3 Hallou! Ich bön **JENNA JAMBROERS**. Ich bön 15 jaor mer ich waer bienao 16. Ich zit al vanaaf det ich vijf jaor bön bie D'n Uul en dit is mien lêste jaor mit de Jeuggarde. Ich bön dankbaar det ich al 10 jaor lid van de Uulefemielie bön.

4 Hallou! Ich bön **SARA VAN ETTEN** en ich bön 13 jaor. Mien hobbie is danse bie The Movement. Ich zit in de 2e klas van de Vrieje Sjoel Broekhin. 't Leukste van de Vastelaovend vinj ich 't gezellig same zeen

5 Hallou! Ich bön **JULES TANKERSLEY**. Ich bön 14 jaor en zit op de Vrieje Sjoel Broekhin. Ich zit sinds dit jaor bie de Jeuggarde. Ich vinj 't danse en de gezelligheid heel leuk en ich verheug mich d'r op det veer mit de ganse Uul gaon oettrèkke.

6 Hallou! Ich bön **MAUD VAN ETTEN** en ich bön 15 jaor. Ich zit op Vrieje Sjoel Broekhin. Mien hobbie is mit vrunj aafspraek. 't Leukste van de vastelaovend is in de aovend mit vrunj nog door feeste toet de lempkes aan gaon

7 Hallou! Ich bön **BIBI BROUNS** en ich bön 13 jaor. Ich zit op ROER Kelezje Sjeundele. Ich doon gaer voetbal en ich gaon dôks nao boete mit vrunj. Ich vinj 't altied leuk es veer d'r op oet gaon mit de garde.

8 Hallou! Ich bön **ZOË KESSELS** en ich bön 12 jaor. Ich zit op 't ROER Kelezje Sjeundele. Dit is mien eerste jaor bie de Jeuggarde. Ich vinj de training op zaoterdaag altied erg leuk en ich verheug mich noe al op de optocht. Lekker vanaaf de wage mit sjlók goje.

9 Hallou! Ich bön **MARIT NELISSEN** en ich bön 13 jaor. Mien hobbies zeen paerdrieje en de Jeuggarde. Waat ich 't leukste vinj aan de Jeuggarde is 't danse en 't feeste mit alle maedjes!



1



2



3



4



5



6



7



8



9

# Kienjermusical 2023 Aafgelas?!

**'t Is ein supergezellige bende in Sjneelandj. De Sjneekuningin äöpent de Wintjersjportsjele. Sjteeds meer miense kómme dao haer. Want waem wilt d'r nog vastelaovend viere?**

Remunj is in de ban van de wintjersjport. Vastelaovend waert daomit sjteeds minder populair. Mer neet bie Dex. Hae wilt gaer sjoolprins waere. Dao haet hae altied van gedruimp. Mer noe liek 't d'r op det zelfs de sjoolvastelaovend aafgelas geit waere, ómdet toch ederein nao de sjnee op fekansie geit. En de Sjneekuningin vindj det prima. Want wie meer miense geine vastelaovend viere, wie meer d'r kómme wintjersjporte. Zie verdeent den meer geldj en vindj vastelaovend daoróm ein bedreiging veur de ekenemie van häör landj! Wintjersjport of toch vastelaovend? Es det mer allemaol good kump...



## Wis geer det ...

- ... zo'n 60 kienjer doon dit jaor weer mit aan de Kienjermusical. De Kienjermusical is ein veursjtelling veur en door kienjer, mit toneel, zank en dans.
- ... dit jaor neet bie de Appelsienerie, want die zeen aan 't verboewe. Daoróm höbbe veer get heel spesjaals: de Kienjermusical Film.
- ... veer dees film in de echte studio van TVEllef höbbe opgenaome?
- ... de film iveur de ganse femielie is. Grootvaders en grootmoders zeen ouch van herte waalgekómme.
- ... de veursjtellinge op 11 en 12 fibberwarie 2023 zeen in 't Royal Theater (de aje bioscoop) aan de Hamsjtraot 7a in Remunj.
- ... op beider daag begint de eerste veursjtelling óm 13:00 oer en de tweede veursjtelling óm 16:00 oer.
- ... nao de veursjtellinge 'ne sjone naozit is, wo ónger 't genót van 'n drenkske nog gezellig kin waere naogeproat.
- ...kaertjes kóste €11,- en zeen te koup via Theaterhotel De Oranjerie in Remunj.
- ... veer elk jaor neet allein ein eige verhaal, mèr ouch ein eige leedje höbbe?
- ... veer van dit leedje dit jaor zelfs eine videoklip höbbe gemaak?
- ... deze videoklip ouch op oos eige YouTube kanaal te zeen is? (Kienjermusical D'n Uul)
- ... det de Kienjermusical ouch op Facebook en Instagram (@kienjermusical\_dn\_uul\_remunj) zit?

## Dans insjtruksie leedje "Kin 't get minder?" Dans geer allemaol mit?!

### VASTELAOVEND AAFGELAS?!

Haaj diene linkerarm horizontaal ter heugte van diene linker sjouwer en maak 'n voes. Duuj diene ellebaog nao boete. Maak tegeliektied met diene linkervoot 'ne pas nao links. Haaj vervolges diene rechterarm ter heugte van diene rechtersjouwer, maak ouch ein voes, en duuj deze ellebaog ouch nao boete. Diene linkerarm blief sjtaon zowie d'r sjtóng. Maak mit diene rechervoot 'ne pas nao rechts.

### NAE, HIE SJTEIT DE GANSE KLAS

Wies mit diene linker wiesvinger sjuuns links nao de gróndj en sjtamp mit diene linkervoot. Wies mit diene rechter wiesvinger sjuuns rechts nao de gróndj en sjtamp mit diene rechervoot.

### WANT VEER HAJE VÄÖL TE VÄÖL

Maak van dien wiesvingers en doeme 'n hertje en laot 't hertje omhoog gaon toetdet dien erm helemaal gesjtrek zeen.

### VAN KNALLE EN VAN FEES

Bewaeg dien erm op en neer baove diene kop, esof se aan 't juiche en feeste bös.

### OF 'T SOMS GET MINDER KIN

Maak mit dien henj twee voeste en laot die van baove diene kop zakke toet op dien heupe.

### NAE, VEER GAON D'R VOLOET IN

Sjtoot twee keer dien rechervoets nao veure esof se Superman bös. Dien linkervoets blief op diene heup.

### SJMIENK OP DIENE KIEBUS

Gank mit dien rechervoets veur 't rechter gedaelte van dien gezicht langs, esof se sjmienk op dien gezicht veugs. Herhaal dit mit links, dus dien linkervoets veur dien gezicht en weer nao boete.

### EN TEKEER GAON OPPE BEES

Maak 'ne trómroffel op dien bórs esof se 'ne gorilla bös en gank tekeer wie 'n bees!!

Dit herhaols se op alle koeplette! Oefene mer en veer haope det ederein mit kin danse deze vastelaovend!

## Finaleleed Kienjermusical 2023 "Aafgelas" - Kin 't get minder?

### Couplet 1

Vastelaovend aafgelas!  
Nae, hie sjteit de ganse klas  
Want veer haje väöl te väöl van knalle en van fees  
Of 't soms get minder kin?  
Nae, veer gaon d'r voloet in  
Sjmienk op diene kiebus en tekeer gaon op 't bees

### Couplet 2

Vastelaovend wintjersjport  
't Jaor is eigelik te kórt  
En 't kin neet minder hie, 't kin allein mer meer  
Skibril op mer ouch gesjmienk  
Det is in Remunj 't dink  
Mit de bóntjias nao 't plein en op 't bees tekeer

### Refrein

Hey Bink, kin 't get minder?  
Naaaeeee!



## Veursjtèlle hoofrolsjpelers

### Sjneekoningin

Es Sjneekoningin bön ich de keuningin van Sjneelandj, 't landj det mit de wintersjport de toekóms haet. Want ederein wilt toch wintersjporte?! Ich höb drie dochters: prinses Dramalia, prinses Theatralia en prinses Figuralia. Ich kóm eigelik oet Remunj, mer vastelaovend vinj ich versjrikkelik. Kónfetti in de haor, mit de optóch sjlók taegde de kop gegoojd kriege. Bah! En den dae versjrikkelike meziek. Getverdemme! Vastelaovend zól van mich verbaouje moge waere. Mesjiens lök 't mich waal óm vastelaovend te laote verdwiene. Den kump ederein wintersjporte, verdeen ich lekker vääol geldj en trakteeer ich ederein op graties drinke en sjeeps.



### Dex

Ich heit Dex en ich bön gek op vastelaovend. Mien mam haet vreuger nog bie de Kienjergarde van D'n Uul gedans en miene ome is prins gewaes bie de Kwekkerte in Lin. 't Leefs zól ich dit jaor sjoolprins waere, mit mien bête vrundin Billy es mien prinses. Vastelaovend vinj ich zo sjoon: slingers, belónne, prinsevaere en den nao 't Sjnapsnazebal in 't Witte Kirkske. Ich sjanap neet det d'r luuj zeen die lever gaon wintersjporte den vastelaovend viere.




### Prinses Dramalia

Mien moder is de Sjneekoningin, zie hêlt ech neet van vastelaovend. Ich haaj van TikTok, maar mesjiens ouch van vastelaovend. Want zo eine prins, det leek mich waal get. Noe is miene prins Paulo Sjneeballa, de nummer teen van 't sjneeballeftal. Ich bön ech verleeft op hem. Hae is de bête sjneeballer van Sjneelandj. Dao wil ich gaer ein dekbèdeuvertrek van.



## Doolhaaf

Welke waeg motgepak waere om oet dit doolhaaf te komme?



## Vastelaoveswoordzeuker

Sjtrep al dees wöörd door. De letters die euverblieve vorme twee nuuj wöörd die de oplossing van deze puuzel vorme. Sommige letters waere vaker den eine keer gebroek.

J	S	F	E	K	S	K	E	P	K	E	I	J	S	Aajhoor	Plezeerig
N	E	T	E	A	T	E	G	E	F	F	E	J	S	Allemaal	Prinse
U	J	I	R	E	G	A	L	H	C	S	T	O	J	Bacchus	Remunj
M	D	R	O	E	R	K	A	D	E	E	S	P	T	Beer	Roerkade
E	E	N	T	O	A	R	T	J	I	U	L	T	A	Effe get aete	Schlager
R	E	L	E	Z	A	W	K	N	H	E	K	O	S	Kloeke	Sjiek pekske
A	L	E	L	V	A	E	E	C	Z	O	L	C	I	Kroege	Sjtasiëplein
N	L	S	U	T	I	B	C	E	R	M	O	H	E	Lache	Sjteine brök
O	L	L	U	Z	R	A	E	E	O	E	E	R	P	Leedjes	Träöt
A	A	E	E	O	B	R	E	T	S	G	K	J	L	Meziek	Uule
G	C	M	K	M	I	B	S	L	U	N	E	N	E	Mötske	Vastelaovend
T	H	A	O	G	A	K	V	E	U	I	I	U	I	Muus	Vrunj
E	E	N	E	G	E	O	R	K	M	Z	D	R	N	Oetgaon	Wazel
O	D	N	E	V	O	A	L	E	T	S	A	V	P	Optoch	Zinge



## JEUGPRINS VAN D'N UUL 2023 JIMI I VAN REY

### Waar 't al oijt 'ne druim van uch óm Prins te waere?

Jao, sins det ich 'n jaor of 4 bön en al helemaal wie ich Danieck zoog es Prins.

### Höb geer flot 'jao' gezag of mós geer d'r nog aeve euver naodinke?

Medein 'jao' gezag!

### Wie zeet geer toet de keus van de leje van eur Prinselik Gezelsjap gekómme?

De leje zeen adjudante Tijn, 'ne echte Vastelaovendvierder en hae zit bie de Uulejónges en Sam ómdet 'r veurig jaor de bête Vastelaovendvierder waar van de klas en toen dach ich; "det is 'ne goje Vastelaovendvierder!"

### Nao waat veur ivvenement kiek geer 't meiste oet?

Sjolefestasie en Sjtasiefestasie ómdet ich dan heel vääö mienze zeen en det is waal cool op zón groot podium.

### Gaot geer 't misse óm mit al eur vrunj Vastelaovend te viere?

Neet persé want ich vier al mit häör Vastelaovend.

### Waat vinjt geer 't meist bezónjer óngerdeel van eur prinsepak?

De móts mit de vaere.

### Waat wilt geer de laezers van deze Uulewapper nog laote weite?

Det ich ze 'ne hele sjone Vastelaovend wins.

“ALLES PALETTI!?  
CONFETTI!!”

## PRINS VAN D'N UUL 2023 SPENCER I HINZEN

### Waar 't al oijt 'ne druim van uch óm Prins te waere?

Jaozeker! Es 'ne echte Remunjse jóng en 'ne echte Vastelaovesganger is 't altied al miene Vastelaovesdruim gewaes. 't Is sjoon óm noe te weite det druime sóms oetkómme.

### Höb geer flot 'jao' gezag of mós geer d'r nog aeve euver naodinke?

't Waar derek jao, nog gein sekónde getwiefeld!

### Wie zeet geer toet de keus van de leje van eur Prinselik Gezelsjap gekómme?

't Waar al derek dudelik waem ich d'r bie wól höbbe. Ich had eigelik tevääö name op de lies sjtaon. Door 't corona gebeure höb ich de samesjtelling mótte aanpasse mer oeteindelik höb ich de adjudante óm mich haer die allemaol op 't eerste lieske sijtinge.

### Nao waat veur ivvenement kiek geer 't meiste oet?

De Vastelaovend is veur mich éin groot ivvenement, al zeen d'r momente in de Vastelaovend die mich aan 't haer ligke. Veural de Sjtasiefestasie, op zónndaag op sjtap mit mien vrunj es de Buusjoppe en de Sirk! Ouch al mis ich 't trummelke...

### Gaot geer 't misse óm mit al eur vrunj Vastelaovend te viere?

Ich gaon d'r vanoet det mien vrunj zeker ónger dit seizoen d'r döks genóg bie zólle zeen. En moog 't neet zo zeen, dan haole v'r det volgend jaor dóbbel en diek in!!!

### Waat vinjt geer 't meist bezónjer óngerdeel van eur prinsepak?

'n Erg meujelike keuze mer es ich mótt keze, dan gaon ich veur de sjteek. Det is, same mit 't Prinsekruuts, 't óngerdeel waat ich veur 'n groot gedeelte zelf höb moge samesjtelle. 't Is veur mich ouch 'n vas óngerdeel van mien oetróosting binne D'n Uul nao de toekóms toe. De sjteek zal altied bie mich blieve.


### Waat wilt geer de laezers van deze Uulewapper nog laote weite?

Ich bön altied al 'ne laevesgeneter gewaes. Pózzetief

ingesjteld en aoep nao ederein. Gaer zól ich zeen det ederein aoep en pózzetief is nao oos mede-Vastelaovesgangers. Geneet van 't laeve en geneet van de Vastelaovend. 't Zeen mer zès daag en laote v'r 't verke vol gebroeke die daag. Dus...

“VERGAET NEET TE LAEVE!!”





Ge maakt door: Madeline Geenen



## KOLOFÓN

### Riddaksie

Hein Jambroers  
Frits Criens  
Luuk Hendriks  
Roel Hendriks  
Dennis Engelen

### Mit dank aan:

Sjtadsjeugprins Jimi I  
Vórs Dirk I  
Vastelaovessjager LimBo  
Sjtadsprins Spencer I  
Joep Opheij  
Claudia Nelissen  
Henriëtte Janssen-Klaar  
Madeleine Geenen  
Karin Straus  
Shoshan Benjamin  
Monique Sijben  
Marijn van Etten – Baars  
Renée Tobben  
Joost Houben  
Gijs van den Brand  
Maarten Uytterwijk  
Louis Wolters, Ere-archivaris  
De Kienjergarde  
De Jeuggarde  
De Uulejónges  
De Kienjer en leijing van  
de Kienjermusical

### Fotoos:

Femielines van de Sjtadsjeug-  
prinselijke gezelsjappe,  
Kienjergarde, Jeuggarde,  
Uulejónges en de Kienjermusical.  
Dagmar Cillekens  
Carla Klaver  
Hoffotograaf Harrie Allers  
Foto Studio Bongers  
De riddaksieleje

### Oetgaaf:

Sjtadsvastelaovesvereniging D'n Uul  
Posbös 11, 6040 AA Remunj

### Vórmgaeving:

Marjo Peeters, ontwerpburo M  
www.ontwerpburo.nl

### Drök:

ARS Printmedia

### Kóntak:

www.dn-uul.nl  
uulewapper@dn-uul.nl

©Copyright 2023

Alle sjrieverrechte mit betrekking  
toet de inhoud van dees oetgaaf waere  
oetdrökkelik veurbehaje. Dees rechte  
beröste bij Sjtadsvastelaoves-  
vereniging D'n Uul Remunj ofwaal bij  
de betreffende sjriever.



# *Sjone Vastelaovend!*

Tijdens carnaval gaan uw bankzaken gewoon door. Daarom kunt u online 24 uur per dag veel bankzaken zelf regelen. Ook kunt u ons telefonisch bereiken via (088) 722 66 00.